


Cant.  
1.



**S**ancta Ma-rí-a, Te de-cus omne Cæ-li-tus ornat,  
Teque supérna Grá-ti-a replet. R. O pi-a Virgo, Ma-ter et  
alma, Nostra be-nígne Sú-ci-pe vo-ta.

2. Casta colúmba  
Advenis orbi  
Núntia vitæ,  
Pacis in ore  
Pígnora portans.  
R. O pia.
3. Astra tenéntis  
Fília Regis  
Magna poténsque:  
Nam super omnes  
Tu benedícta.  
R. O pia.
4. Múnere divo  
Sola fuísti  
Néscia culpæ,  
Tota refúlgens  
Lúmíne sancto.  
R. O pia.
5. Tu paradísus!  
Quam tua pulchra  
Lília vernant,  
Atque rosárum  
Púrpura splendet!  
R. O pia.
6. Quod rea mortis  
Abstulit Eva,  
Ecce salútis  
Tu reparátrix  
Gérmíne reddis.  
R. O pia.
7. Clausa per Evam  
Jánua cæli  
Jam patet ad nos,  
Te mediánte,  
Rursus apérta.  
R. O pia.
8. Spléndida stella,  
Per maris undas  
Ne pereámus,  
Fulget amíca  
Lux tua ductrix.  
R. O pia.
9. Nostra dat intus  
Vita timóres:  
Cúrrimus ad te:  
Nunc et in hora  
Mortis adésto.  
R. O pia.